

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U
TUZLI
Broj: 32 0 St 457800 23 St
Tuzla, 28.05.2024. godine

Općinski sud u Tuzli, sudija Antonela Đaković kao stečajni sudija u stečajnom postupku nad stečajnim dužnikom „FAIP“ d.o.o. za osposobljavanje i zapošljavanje lica oštećenog sluha Srebrenik, nakon provedenog prethodnog stečajnog postupka donio je dana 28.05.2024. godine slijedeće:

R J E Š E N J E

OTVARA SE stečajni postupak nad imovinom dužnika „FAIP“ d.o.o. za osposobljavanje i zapošljavanje lica oštećenog sluha Srebrenik, MBS:1-12950, JIB: 4209627470003, račun broj: 1610500002620053 otvoren kod Raiffeisen Bank d.d.

Za stečajnog upravnika imenuje se Topić Alma iz Gračanice, ul. Riječka 50.

ZAKLJUČUJE SE stečajni postupak nad imovinom dužnika „FAIP“ d.o.o. za osposobljavanje i zapošljavanje lica oštećenog sluha Srebrenik, zbog nedostatka stečajne mase za pokriće troškova stečajnog postupka.

Rješenje će se objaviti na Oglasnoj tabli suda, WEB stranici suda, Službenim novinama F BiH, te dostaviti FIA-i.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjelenju registra ovog suda, radi brisanja stečajnog dužnika iz sudskog registra.

O b r a z l o ž e n j e

Rješenjem Općinskog suda u Tuzli broj 32 0 St 457800 23 St od 26.01.2024. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „FAIP“ d.o.o. za osposobljavanje i zapošljavanje lica oštećenog sluha Srebrenik, a za privremenog stečajnog upravnika imenovana je Topić Alma, a sve temeljem člana 61. Zakona o stečaju (Sl. novine F BiH 53/21).

Privremeni stečajni upravnik dostavio je Izvještaj o provedenom prethodnom postupku ovom sudu dana 27.02.2024. godine. Iz izvještaja privremenog stečajnog upravnika proizilazi da je društvo prestalo sa radom društvo prestalo sa radom Odlukom osnivača br:13/23 od 31.08.2023.godine. Osnovna djelatnost društva je bila djelatnost održavanja motornih vozila, autopraona i vulkanizerske usluge. Sjedište društva je bilo u iznajmljenim prostorijama, a osnivač i direktor društva bio je Mirsad Kešetović. Računi u bankama su blokirani, društvo nema zaposlenika, niti pokretne i nepokretne imovine, te ne postoji mogućnost nastavka poslovanja istog. Društvo ima obaveze prema Poreznoj upravi FBIH KPU Tuzla u iznosu od cca. 11.915,74 KM po osnovu poreza i doprinosa, dok tačan iznos obaveza može biti utvrđen prijavama povjerilaca u slučaju pokretanja stečajnog postupka.

U smislu odredbe člana 103. stav 1., u vezi sa odredbom člana 102. stav 7. Zakona o stečaju F BiH („Sl. novine F BiH“ broj 53/21), a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je Javnim pozivom od 25.03.2024.godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama FBiH uplate iznos od 3.000,00 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica objavljeno je u Službenim novinama F BiH broj 27/24 dana 12.04.2024.godine, oglasnoj tabli suda dana 27.03.2024. godine i na web stranici suda.

Obzirom da u ostavljenom roku koji je propisan zakonom povjerioci ili neko od zainteresovanih lica nije izvršio uplatu predujma za finansiranje troškova stečajnog postupka, sud je u smislu odredbe člana 102. stav 8. Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102. stav 8. Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBiH i Upravi za indirektno oporezivanje BiH.

Nadalje, temeljem odredbe člana 204. stav 1. i 3., a u vezi sa odredbom člana 190. stav 10. Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti za FIA, dok je odredbom člana 204. stav 2. istog Zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204. stav 5. Zakona o stečaju.

Na osnovu odredbe člana 206. stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102. stav 8. Zakona o stečaju sud je postupio kao u izreci rješenja.

Stečajni sudija

Antonela Đaković

POUKA O PRAVNOM LIJEKU:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu Tuzla, putem ovog suda, u roku od 8 dana, od dana objavljivanja rješenja u Službenim novinama.